



**ЎЗБЕКИСТОН RESPUBLIKASI ОЛИЙ СУДИ
ЎЗБЕКИСТОН RESPUBLIKASI ИЧКИ ИШЛАР ВАЗИРЛИГИНИНГ
ҚАРОРИ**

Судлар, суд процесслари ва улар иштирокчиларининг хавфсизлигини таъминлаш тартиби тўғрисидаги йўриқномани тасдиқлаш ҳақида

Ўзбекистон Республикаси Президентининг 2017 йил 21 февралдаги ПФ-4966-сон «Ўзбекистон Республикаси суд тизими тузилмасини тубдан такомиллаштириш ва фаолияти самарадорлигини ошириш чора-тадбирлари тўғрисида»ги Фармониغا мувофиқ, Ўзбекистон Республикаси Олий суди ҳамда Ички ишлар вазирлиги **қарор қилади:**

1. Судлар, суд процесслари ва улар иштирокчиларининг хавфсизлигини таъминлаш тартиби тўғрисидаги йўриқнома иловага мувофиқ тасдиқлансин.
2. Мазкур қарор расмий эълон қилинган кундан эътиборан кучга киради.

Олий суд раиси

Тошкент ш.,
2018 йил «23» февраль,
11-87 -сон



К. Камиров

Ички ишлар вазири

Тошкент ш.,
2018 йил «23» февраль,
20 -сон



П. Бобожонов

Ўзбекистон Республикаси
Олий суди ва Ички ишлар вазирлигининг
2018 йил 23 февралдаги
11-87, 20-сон қарорига
ИЛОВА

**Судлар, суд процесслари ва улар иштирокчиларининг
хавфсизлигини таъминлаш тартиби тўғрисидаги
ЙЎРИҚНОМА**

Ушбу Йўриқнома Ўзбекистон Республикаси Президентининг 2017 йил 21 февралдаги ПФ-4966-сон “Ўзбекистон Республикаси суд тизими тузилмасини тубдан такомиллаштириш ва фаолияти самарадорлигини ошириш чора-тадбирлари тўғрисида”ги Фармонига мувофиқ судлар, суд процесслари ва улар иштирокчилари ҳамда яқин қариндошларининг хавфсизлигини таъминлаш тартибини белгилайди.

1-боб. Умумий қоидалар

1. Судлар, суд процесслари ва улар иштирокчилари ҳамда яқин қариндошларининг хавфсизлигини таъминлаш ички ишлар органлари томонидан амалга оширилади.

2. Алоҳида ҳолларда хавфсизликни таъминлаш чоралари қонун ҳужжатларига мувофиқ тезкор-қидирув фаолиятини амалга оширувчи бошқа органлар билан ҳамкорликда амалга оширилиши мумкин.

3. Ушбу Йўриқномада қуйидаги асосий тушунчалар қўлланилади:

суд биноси – судьялар, суд аппарати ходимларини доимий асосда жойлаштириш учун мўлжалланган бино ёки унга бириктирилган ҳудуд;

судга ташриф буюрувчи шахс – суд биноси ёки унинг ҳудудига вақтинча (суд мажлиси иштирокчиси сифатида, ўз ихтиёри ёки хизмат вазифаларини бажариш муносабати билан) келган ҳар қандай жисмоний шахс.

4. Ўн олти ёшга тўлмаган шахслар, башарти улар суд процессида иштирок этувчи шахс бўлмасалар суд мажлиси залига киритилмайди.

5. Судга ташриф буюрувчи шахслар суд биносига шахсини тасдиқловчи ҳужжати асосида кириб чиқади.

2-боб. Судлар хавфсизлигини таъминлаш

1-§. Суд биноларини қўриқлашга қабул қилиш

6. Судлар хавфсизлигини таъминлаш суд биноларини қўриқлашдан иборат. Суд биноларини қўриқлаш Ўзбекистон Республикаси Вазирлар Маҳкамасининг 2014 йил 24 январдаги 16-сон “Ўзбекистон Республикасида қўриқлаш фаолияти билан шуғулланишни тартибга солиш чора-тадбирлари тўғрисида”ги қарорига мувофиқ ички ишлар органларининг қўриқлаш бўлинмалари томонидан амалга оширилади.

7. Ўзбекистон Республикаси Олий суди ҳузуридаги Судлар фаолиятини таъминлаш департаменти (бундан буён матнда Департамент деб юритилади) судлар хавфсизлигини таъминлаш мақсадида суд биноларининг қўриқланишини ташкил этиш



учун ички ишлар органларининг кўриқлаш бўлинмалари ходимларини кўриқлаш хизмати кўрсатиш бўйича тузиладиган шартнома асосида жалб этади.

2-§. Суд биноларини кўриқлашни таъминлаш

8. Қорақалпоғистон Республикаси Ички ишлар вазирлиги, Тошкент шаҳри Ички ишлар бош бошқармаси, вилоятлар ички ишлар бошқармалари кўриқлаш бошқармалари (бундан буён матнда ҳудудий кўриқлаш бошқармалари деб юритилади) Департамент билан тузилган кўриқлаш хизмати кўрсатиш бўйича шартнома асосида суд биноларини кўриқлаш ишини ташкил этади.

9. Суд биноларини кўриқлаш ишини ташкил этиш учун ҳудудий кўриқлаш бошқармалари кўриқлашни амалга ошириш учун шахсий таркиб (бундан буён матнда кўриқлаш хизмати ходимлари деб юритилади) ажратади.

10. Кўриқлаш хизмати ходимлари томонидан суд биноларини кўриқлаш кеча-кундуз амалга оширилади.

11. Кўриқлаш хизмати ходимлари кўриқланаётган суд биносини ўзига хослигини, сигнализация ва ёнгин ўчиришнинг бирламчи воситалари жойлашган жойларни ва улардан фойдаланишни билиши ҳамда уларни соз ҳолатда эканлигини мунтазам текшириб, аниқланган барча камчиликлар бўйича дарҳол суд раисига хабар бериши лозим.

3-боб. Суд биноларида ички ва кириб-чиқиш тартибини таъминлаш

1-§. Суд биносидаги ички тартиб қоидалар

12. Суд биносида иш тартиби:

иш вақти – соат 09:00 дан 18:00 гача;

тушлик вақти – соат 13:00 дан 14:00 гача;

дам олиш кунлари – шанба, якшанба;

дам олиш ва байрам кунлари суд ходимларининг иш вақти ҳамда масъул ходимларнинг навбатчилиги суд раиси буйруғига асосан амалга оширилади ҳамда буйруқ нусхаси назорат ўтказиш пунктига топширилади.

13. Суд мажлисини фототасвирга тушириш, аудио ва видеоёзувини амалга ошириш, шунингдек оммавий ахборот воситаларида трансляция қилинишига суд мажлисида раислик қилувчининг (бундан буён матнда раислик қилувчи деб юритилади) рухсати билан йўл қўйилади.

14. Суд биносига мобил телефон, аудио, фото ва видео қайд этиш воситалари ҳамда электрон маълумот ташувчи ва узатувчи ускуналарни раислик қилувчининг рухсатисиз олиб кириш тақиқланади.

15. Суд биносига ўқотар қурол, портловчи, захарли, радиоактив ҳамда бошқа кучли таъсир этувчи кимёвий моддалар, қўлланилиши (фойдаланилиши) атрополагилар хавфсизлигига таҳдид солувчи бошқа буюм ва воситаларни олиб кириш тақиқланади, бундан конвой ва фельдъегер махсус почта хизмати ходимлари ҳамда судьянинг ўқотар қуроли мустасно.

16. Судга ташриф буюрувчи шахслар ўзлари томонидан олиб келинган суд биносига олиб кириш тақиқланган буюмларни (мобил телефон, аудио, фото ва видео қайд этиш воситалари ҳамда электрон маълумот ташувчи ва узатувчи ускуналар) суд

BLIK

AVLA
XATI
KAZI

0*1E

маъмурияти томонидан махсус ажратилган жойларда қолдириб кириши ҳамда суд биносидан чиқишида ўзи билан олиб кетиши лозим.

17. Суд биносининг назорат ўтказиш пунктида хавфсизликни таъминлаш мақсадида хизмат олиб бораётган кўриқлаш хизмати ходимлари судга ташриф буюрувчилар ва уларнинг буюмларини металлодетекторлардан фойдаланган ҳолда текшириши мумкин.

18. Моддий товар бойликларини (мебель, компьютер ва ҳ.к.) олиб кириш ва олиб чиқиш суднинг масъул ходими томонидан имзоланган махсус рухсатнома асосида амалга оширилади.

Махсус рухсатнома билан моддий товар бойликларини олиб кириш ва олиб чиқиш рухсатнома ёзиб берилган кунда бир мартаба амалга оширилади.

19. Судга ташриф буюрувчи шахслар суд биносига суднинг масъул ходимлари томонидан расмийлаштириб берилган бир марталик рухсатнома асосида кириб чиқишлари мумкин, бундан мазкур Йўриқноманинг 20, 21, 24, 25-бандларида кўрсатилган ҳоллар мустасно.

20. Суд мажлиси ўтказиладиган вақтда судга ташриф буюрувчи шахслар суд мажлиси ўтказиладиган вақт ва суд мажлисига чақирилган шахсларнинг рўйхати кўрсатилган рухсатнома (бундан буён матнда рўйхат деб юритилади) асосида суд биносига киритилади.

Рўйхат судья томонидан тасдиқланади ва кўриқлаш хизмати ходимларига суд мажлиси бошланишидан олдин тақдим этилади.

Суд ходими суд мажлиси бошланишидан олдин, суд мажлисига чақиртирилган шахсларни рўйхат асосида суд биносига олиб киради.

21. Судга чақирув қоғози билан чақирилган шахслар чақирув қоғози асосида суд биносига киритилади.

22. Суднинг чақирув қоғози бўлмаган ёки рўйхатга киритилмаган шахслар суд биносига бир марталик рухсатнома асосида киритилади.

23. Бир марталик рухсатнома, рўйхат ҳамда судга чақирув қоғози судга ташриф буюрувчи шахснинг шахсини тасдиқловчи ҳужжатини кўрсатилганда ҳақиқий ҳисобланади.

Судга ташриф буюрувчи шахс суд биносидан чиқаётган вақтда бир марталик рухсатномани қабул қилган мансабдор шахснинг имзоси билан тасдиқлатиб, кўриқлаш хизмати ходимига топширади.

24. Судга ташриф буюрувчи шахслар очик суд мажлисига шахсини тасдиқловчи ҳужжатини кўрсатган ҳолда киришлари мумкин.

25. Қуйидаги шахслар суд биносига назорат ўтказиш пункти орқали хизмат гувоҳномасини очик ҳолда кўрсатган ҳолда кириш ҳуқуқига эга:

Ўзбекистон Республикаси Олий Мажлиси Қонунчилик палатаси депутатлари ва Сенати аъзолари;

Ўзбекистон Республикаси Президенти девонининг масъул ходимлари;

Ўзбекистон Республикаси Вазирлар Маҳкамасининг масъул ходимлари;

Ўзбекистон Республикаси Конституциявий судининг масъул ходимлари

Ўзбекистон Республикаси Олий судининг масъул ходимлари;

Ўзбекистон Республикаси Судьялар олий кенгашининг масъул ходимлари;



Ўзбекистон Республикаси Бош прокуратурасининг масъул ходимлари;
Ўзбекистон Республикаси Адлия вазирлигининг масъул ходимлари;
Ўзбекистон Республикаси Миллий хавфсизлик хизматининг масъул ходимлари;
Ўзбекистон Республикаси Инсон ҳуқуқлари бўйича миллий марказининг масъул ходимлари;
Ўзбекистон Республикаси Олий Мажлисининг Инсон ҳуқуқлари бўйича вакили (омбудсман);
вазирликлар ва давлат қўмиталарининг раҳбарлари;
Ўзбекистон Республикаси Олий суди ҳузуридаги Судлар фаолиятини таъминлаш департаменти ва ҳудудий бўлимларнинг масъул ходимлари;
судьялар ва суд ходимлари;
фельдъегер хизматининг махсус алоқа ходимлари.
26. Суд биносига қуйидаги шахслар киритилмайди:
катта ҳажмли сумка, чемодан, қути, тугун ва ҳайвонлар билан кириш истагини билдирган шахслар;
қўл юкини кўриқдан ўтказиш ёки шахсини тасдиқловчи ҳужжатини кўрсатишдан бош тортган шахслар;
спиртли ичимликлар, наркотик воситалар ёки психотроп моддалар таъсирида бўлган шахслар.

4-боб. Суд процесси хавфсизлигини таъминлаш

27. Суд процесси хавфсизлигини таъминлашни ташкил этиш ички ишлар органлари томонидан амалга оширилади.

28. Суд процессини ўтказишда тўсқинликлар вужудга келиши эҳтимолини тасдиқловчи асослар мавжуд бўлганида раислик қилувчи ёки суд раиси суд мажлиси ўтказилишига камида уч кун қолганда, суд процесси хавфсизлигини таъминлаш учун зарур чоралар кўриш тўғрисида туман (шаҳар) ички ишлар бўлимларига ёзма хабарнома жўнатади.

29. Туман (шаҳар) ички ишлар бўлимлари суднинг ёзма хабарномасини олганидан сўнг, хабарномада кўрсатилган муддатларда суд процесси хавфсизлигини таъминлашни ташкил этиш учун ходимлар ажратади.

30. Суд процесси хавфсизлигини таъминлаш учун ички ишлар органи ходимлари томонидан қуйидаги чоралар амалга оширилади:

раислик қилувчи ёки суд раиси билан келишувга биноан суд мажлиси хонаси ва маслаҳатхона хавфсизлиги таъминланади;

суд мажлисидан олдин суд мажлиси хоналари ва маслаҳатхонанинг уларда эгасиз ашёлар, ёнувчи, портловчи, заҳарловчи ва бошқа хавфли буюмларни аниқлаш юзасидан текширилади;

ташқи кўриниши ёки юриш-туришидан шубҳа туғдирувчи шахслар текширилади.

31. Суд мажлиси вақтида хавфсизликни таъминлаш учун жалб этилган ички ишлар органи ходимлари доимий равишда суд мажлиси залида бўлади. Суд мажлиси залини тарк этиш фақатгина раислик қилувчининг руҳсати билан амалга оширилади.



32. Ички ишлар органи ходимлари суд процесси хавфсизлигини таъминлаш мақсадида раислик қилувчининг фармойишига асосан суд мажлисида тартибни бузган шахсларни суд мажлиси залидан чиқариб юборади.

33. Суд процессида хавфсизликни таъминлашда ички ишлар органи ходимлари раислик қилувчи ёки суд раисининг суд мажлиси вақтида ва суд биносида тартибни таъминлаш билан боғлиқ бўлган фармойишига бўйсунуши ва суд мажлисида жамоат тартибини таъминлаши шарт.

34. Зарур ҳолларда, ички ишлар органи ходимлари раислик қилувчи ёки суд раисининг фармойишига асосан суд девонхонасидан суд мажлиси ўтказиладиган жойга ёки судья хонасига суд ишлари ва ашёвий далиллар етказиб берилишида уларнинг кўриқланиши ва сақланишини таъминлайди.

35. Ички ишлар органи ходимлари суд мажлиси якунида қилинган ишлар, суд раиси ёки раислик қилувчи томонидан келиб тушган кўрсатмалар, шунингдек суд залидаги барча ҳодисалар ва кўрилган чоралар ҳақида тегишли туман (шаҳар) ички ишлар бўлимига ёзма ҳисобот тақдим этади. Ички ишлар органи ходимларининг суд мажлиси якунланганлиги ҳақидаги ёзма ҳисоботи суд раиси ёки раислик қилувчи томонидан имзоланади.

5-боб. Суд процесси иштирокчиларини ҳимоя қилиш

1-§. Хавфсизлик чораларини қўллаш асослари ва тартиби

36. Суд процесси иштирокчилари, уларнинг оила аъзолари ва яқин қариндошларининг (бундан буён матнда кўриқланаётган шахслар деб юритилади) ҳаёти, саломатлиги, шаъни, кадр-қиммати ва мол-мулкани муҳофаза қилинишини таъминловчи барча зарур чораларни кўриш тўғрисидаги ёзма топшириғи асосида ички ишлар органлари томонидан уларнинг хавфсизлиги таъминланади.

37. Суднинг ёзма топшириғида кўриқланаётган шахсларга нисбатан қўлланилаётган аниқ хавфсизлик чоралари ва уларни амалга ошириш вақтлари кўрсатилган бўлиши лозим.

Бунда ички ишлар органи хавф таҳдид солаётган кўриқланаётган шахсларга доир ишидаги мавжуд маълумотлардан, бу хавфнинг эҳтимол тутилган хусусияти, манбалари, жойи, вақти ва бошқа ҳолатларидан хабардор этилиши зарур.

38. Кўриқланаётган шахсларни хавфсизлигини таъминлаш юзасидан зарур чораларни кўриш тўғрисидаги суднинг ёзма топшириғи туман (шаҳар) ички ишлар бўлимига, нусхаси кўриқланаётган шахсга юборилади.

39. Ички ишлар органлари суднинг ёзма топшириғини олиши билан дарҳол кўриқланаётган шахсларга нисбатан хавфсизлик чораларини кўришлари шарт.

40. Ички ишлар органларининг ўз ваколатлари доирасида кўриқланаётган шахсларни хавфсизлигини таъминлаш юзасидан қабул қилинган қарорлари кўриқланаётган шахслар томонидан ўз вақтида бажарилиши шарт.

41. Кўриқланаётган шахсларга таҳдид солаётган хавф бартараф этилганда ёки хавфсизлик чораларини бекор қилиш учун бошқа асослар вужудга келганда суд томонидан ички ишлар органларига бу ҳақда ёзма равишда хабардор қилади.

Ушбу хабарнома туман (шаҳар) ички ишлар бўлимига, нусхалари эса кўриқланаётган шахсларга юборилади.

2-§. Қўлланиладиган хавфсизлик чоралари

42. Кўриқланаётган шахсларнинг ҳаёти, саломатлиги, шаъни, кадр-қиммати ва мол-мулкни муҳофаза қилиш мақсадида қуйидаги хавфсизлик чоралари қўлланилиши мумкин:

кўриқланаётган шахслар тўғрисидаги маълумотлардан фойдаланишни чеклаш – кўриқланаётган шахсларнинг розилиги билан уларнинг шахси, шунингдек уларнинг яқин қариндошлари, яшаш жойи ва улар ҳақидаги бошқа маълумотларни беришга вақтинчалик чеклов қўйиш;

қонунда белгиланган тартибда ёпиқ суд мажлисини ўтказиш;
шахсни, уй-жой ва мол-мулкни ҳимоя қилиш.

Кўриқланаётган шахсларни ҳаёти, саломатлиги, шаъни, кадр-қиммати ва мол-мулкига етказилиши кутилаётган зарарнинг хавфлилик даражасидан келиб чиқиб, бошқа ўзига хос хавфсизлик чоралари қўлланилиши мумкин.

43. Судьяларнинг шахсий хавфсизлигини таъминлаш мақсадида уларга қонун ҳужжатларида белгиланган тартибда ўқотар қурол берилади.

Зарур ҳолларда тегишли суд раисининг қарорига биноан ички ишлар органи судья ва унинг оиласи учун қуролли соқчилар ажратади.

6-боб. Яқуний қоида

44. Мазкур Йўриқнома талаблари бузилишида айбдор бўлган шахслар қонун ҳужжатларида белгиланган тартибда жавобгарликка тортилади.

